

22 JUN 2001

Indonesia-Mahathir

UCAPAN DR MAHATHIR DAPAT PERHATIAN AKHBAR-AKHBAR INDONESIA

Oleh: Openg Onn

JAKARTA, 22 Jun (Bernama) -- Ucapan dasar Datuk Seri Dr Mahathir Mohamad pada perasmian perhimpunan agung Umno di Kuala Lumpur semalam mendapat perhatian utama harian-harian nasional di sini hari ini.

Hampir semua harian utama menyiarkan ucapan lantang Dr Mahathir sama ada pada muka depan atau muka dalam selain menyiarkan gambar anggota-anggota Umno mengikuti ucapan Perdana Menteri melalui layar raksasa di luar dewan.

Kebanyakan akhbar menyiarkan artikel mengenai ucapan Dr Mahathir, dikeluarkan oleh agensi-agensi berita asing. Dr Mahathir menuduh agensi berita asing itu beberapa kali memberi liputan yang tidak adil mengenai Malaysia.

"Kompas" menyiarkan pada muka depannya berita mengenai Dr Mahathir yang dikutip dari ketiga-tiga agensi berita asing, Associated French Press, Reuters dan Associated Press, dengan tajuk "Mahathir Criticises Opposition and Foreign Countries" "(Mahathir Kritik Pembangkang dan Negara Asing).

Laporan panjang-lebar itu menarik perhatian khusus kepada tuduhan Dr Mahathir bahawa negara-negara Barat memperalatkan parti-parti pembangkang di Malaysia untuk menjatuhkan kerajaan.

Satu-satunya harian berbahasa Inggeris di Indonesia "The Jakarta Post" memuatkan artikel yang sama dengan tajuk "Mahathir launches attack on foreigners, opposition" pada muka depan.

Harian yang baru menemui pembaca tetapi sudah terkenal "Koran Tempo", cabang majalah mingguan yang popular "Tempo", menyiarkan berita 10 perenggan pada muka dua dengan tajuk "Mahathir: Umno Akan Menjadi Minoritas."

Sebuah lagi harian yang berpengaruh "Republika" cuma memuatkan item itu sebagai berita kedua dalam ruangan berita antarabangsanya. Tetapi tajuknya "Little Soekarno Kritik Barat" tidak syak lagi mencuri perhatian dengan menonjolkan kritikan keras Dr Mahathir terhadap Barat.

Akhbar-akhbar Indonesia beberapa tahun dahulu pernah menggelar Dr Mahathir sebagai Little Sukarno sempena presiden yang mengasaskan Indonesia, allahyarham Sukarno, yang juga terkenal dengan kritikkannya yang lantang terhadap kuasa-kuasa Barat.

Ucapan Dr Mahathir dengan menarik perhatian kepada Indonesia apabila beliau berkata slogan "reformasi" gagal membawa perubahan yang dikehendaki juga dimuatkan dalam akhbar berkenaan tanpa disunting oleh editor berkenaan.

-- BERNAMA

OPP AHH FAZ